

■ ORD LA VITA DA LUDMILLA CAHENZLI

La tema da cedels ed il cumpost sco confiart

«Mamma in cedel», tuni dal corridor. Merda! Panica! Nua pudess jau ma zuppar? Jau avrel la stgaffa da rument e guard sin il cumpost. Il pli gugent ma struztgass jau lient. Ma igl è memia tard. Il pitschen stat avant mai e ma tegna nà in cedel oransch. In vairamain agressiv oransch.

Jau survegn la tremblitga, na ristg betg da tutgar en il cedel e m'imagin tge torturas ch'il scolast ha puspè inventà per destruir mia planisaziun dal di u da l'emna e per ma sfratgar psichicamain.

«Metta il cedel sin maisa», ditg jau.

«Ma Ti stos leger immediat, nus giain oz suenter mezdi a far bogn», di el.

«Tge bun'idea», ditg jau tut levgiada.

«Gea. Nus giain cun velo», di el.

«Betg vairà», e la panica ch'è gist sa fugida, sa sturtiglia puspè da mes scussal siadora: «Cun tge velo vul lura ir?» dumond jau a moda precauta.

«Cun il mieu», di el.

«Ma lez è rut», ditg jau. «Jau sai», di bolleret. «Il bab po svelto pinar el.»

«Lez na vegn betg a gentar oz.»

«Lura pinas halt ti el», di el e svanescha ord cuschina.

«Jau na pinel betg velos!» clam jau suenter. Ed avant mes egl vegni verd.

Igl è betg il svaniment che fa verd avant mes egl. Igl è mia matta gronda ch'è era turnada da scola e tegna in cedel cler-verd avant mia fatscha. Igl è in verd propi tissientà.

«Tge è quai?» dumond'jau mia feglia entant ch'jau guard sin la porta davos la quala il cumpost sa chata – il cumpost mes salvament, mes davos confiart!

«Nus giain sin viadi da scola», di la matta.

«Bel. E cura?» dumond jau.

«Puschmaun», di ella. «Nus stuain trair en buns chalzers da muntogna, ha il scolast ditg. Na sco l'ultima giada che l'entira classa aveva vischias.»

«Cler», ditg jau. Jau ma sugeresch: Pensa positiv Ludmilla! Ils chalzers veders van segir anc, van segir anc, van segir anc, van segir anc, van segir anc.

Suenter gentar ma rend jau giun tschaler per examinar ils velos. Tuts trais kaputt. Entant ch'jau emprov d'eruir tgenin ch'jau fiss pipa da pinar, vegn la gronda: «Els fan mal.»

«Tgi fa mal?» dumond'jau.

«Ils chalzers da muntogna», di la gronda.

«Nunpussaivel. L'onni passà hai jau aposta cumprà els duas numras pli grond», di jau.

«Ma uss èn els tuttina memia pitschens. Jau dovr novs», di ella.

«Ti vas cun quels!»

«Na.» «Bain», etc.

(Quai ch'jau pens en quellas minutas dals scolsts na fiss betg hofli da scriver si.)

La figlia lamenta uschè ditg fin ch'jau empermett – malgrà contos sblundregiads – dad ir cun ella a cumprà chalzers novs.

Mes'ura pli tard: Igl è ruassaivel en chasa. Ils uffants èn puspè a scola, resp. ids a far bogn. Speranza tegna il velo! Igl è il suentermezdi che tuts han scola. Tge bellezza. Tge libertad infinita – fin las 15.30.

Jau ma fatsch in café, ses en davos maisa-cuschina ed ignoresch il cedel verd cun la lunghezza glista da chaussas che la gronda ha da prender cun sai sin il viadi da scola. «Tai na legel jau uss betg», ditg jau a la glista e guard demonstrativ en in'otra direziun.

Mia eglia da croda sin la paraid da pin. Là penda in cedel mellen. Quest cedel ma vegn avant insaco enconuscent. Cler, quai è il cedel pervi dal polizist che visita la classa da mia matta pitschna. Cura è quai atgnamain? Jau pren il cedel giu da la paraid. Quai è gea oz. Oz suenter mezdi. Il polizist mussa als uffants co ch'ins va sur via vi. Mia eglia da croda sin l'ultima construcziun. «I vegn giavischè che la mamma u il bab assista a la scolaziun da traffic.» Jau avr la porta da rument, guard en il compost e vi siglir enagiu. Ma lura cumpara avant mes egl il maletg da mia pitschna matta che ha instrucziun da traffic. Il polizist è là. Tut las mammas èn là. Danor la mamma da mia pitschna matta. Jau ser immediat la porta, lasch esser mes café café, lasch esser naira mia detta da pinar velos e festin da vegnir ad uras a l'insrucziun da traffic.

Ludmilla Cahenzli

P.S. Per cas ch'jau avess in di d'esser svanida, guardai simplamain en il cumpost!